



UPA 2024/97 – UPA 2024/161

23/4-2024

Jens-Frederik Nielsen

Nioqquissanik eqqussuinermi akitsuutit pillugit Inatsisartut inatsisaata allanngortinnissaanut, taamaasilluni tipigissaatit, pinnersaatit eqqiluisaarnermullu atortut eqqussinermut akitsuutaat (Akitsuutit normuat 090) peerneqarluni, Naalakkersuisut siunnersuummik saqqummiussaqarnissaannik piumaffigineqassasut Inatsisartut aalajangiiffigisassaattut siunnersuut.

(Inatsisartunut ilaasortaq Nivi Olsen, Demokraatit)

(Siullermeerneqarnera)

Nioqquissanik eqqussuinermi akitsuutit pillugit Inatsisartut inatsisaata allanngortinneqarnera pillugu Inatsisartut inatsisaannut siunnersuut

(Aningaasaqarnermut Akileraartarnermullu Naalakkersuisoq)

(Siullermeerneqarnera)

Qujanaq Demokraatit Inatsisartuni ilaasortaatitaannut Nivi Olsenimut tipigissaatit, pinnersaatit eqqiluisaarnermullu atortut eqqussinermut akitsuutaasa peerneqarnissaanik siunnersuuteqarneranut. Paasivara, siunnersuut ima pitsaatigisoq, Naalakkersuisut oqaluuserisassani paasigamikku, Naalakkersuisut issuarniarlugu aaliangersimagaat. Tamanna Demokraatini nuannaarutigaarput, ersarissumillu Naalakkersuisunut kajumissaarutigerusullugu Demokraatit siunnersuutaat allat aamma issuassagaat. Tamanna nunatsinnut pitsaassagaluaqimmat.

Taamatut oqareerlunga Naalakkersuisut eqqussuinermi akitsuutinik katillugit 28 millioner koruuninik nalilinnik peerneqarnissaannik siunnersuutaannut saakkusuppunga. Tusarneqaq, kisiannili Naalakkersuisut pitsassuartut isigisaattut eqqissaanngilaq. Assersuutitsalaaginnarpoq, qanoq ililluni kaasarfimmit kaasarfimmut nutseriinnartoqartarneranik akerlianik, innuttaasut oqlisaanneqarnerminnik misigitinneqaratik.

Eqqaamassavarput, Naalakkersuisut partiillu aningaasaqarnermut inatsisip 2024-imut isumaqatigiissuteqaramik apeqqusiinngivissorlutik 85 millioner koruuninik innuttaasut kaasarfiiinit aallernerat poortutissat akitsuutillu naleqqussannginnerani. Ilumut 85 millioner koruunit. Taava massakkut 28 millioner koruunit utertippaat. Taamaaliornikkut niaqqumoorluni naatsorsuipallakkanni oqartoqarsinnaalluni, Naalakkersuisut suli innuttaasunut 57 millioner koruuninik taarsigassaqarput. Soorlu oqaluttuap taannartaa, Naalakkersuisup oqaluttuarissallugu puigoraat.

Taamatut oqareerluta, Dmokraatinuit ilisimaneqareersutut kissaatigaarput, innuttaasut imminnut aningaasaateqarnerulernissaat. Uuminnga siunnersuuteqarnikkut atuinermi iluaqtissat arlallit, akitinnerulissapput, tamannalu tamakkiisumik taperserparput. Naalakkersuisulli akitsuutinik appaanissaq taakku ima isikkoqartikkunnaanialisigit, soorluli innuttaasunut tunissutit. Taakku 85 millioner koruunit Naalakkersuisut akuerseqataasullu partiit innuttaasut kaasarfianit aassat uani ukiumi aningaasanut inatsisip aalajangerneqarnerani tassa isumaqarpoq, innuttaasut aningaasaatikinnerulerannik.



Demokraatit suli isumaqarput, kukkunerusoq poortuutissanut akitsuutinut innuttaasut kaasarfiannit 85 millioner koruuninik aallerneq, kajumissaarusupparpullu Aningaasaqarnermut- aamma akileraartarnermut ataatsimiitaliaq uunga siunnersuummut allannguutissatut siunnersuuteqassasoq taamaasilluni, poortuutissanut akitsuut peerneqarniassamat.

Taamatut oqaaseqaateqarluta siunnersuutip Aningaasaqarnermut- aamma Akileraartarnermullu ataatsimiitaliami suliareqqinnejarnissaa innersuussutigaarput.